

AWIG-AWIG DESA ADAT SUSUT



**DESA TUA KECAMATAN MARGA
KABUPATEN DAERAH TINGKAT II TABANAN
WARSA 1999**

BANTANG AWIG-AWIG DESA ADAT SUSUT

		Kaca
MURDDHA CITTA		1
PRATHAMAS SARGAH	ARAN LAN WEWIDANGAN DESA'	2
DWITIYAS SARGAH	PATITIS LAN PAMIKUKUH	3
TRTIYAS SARGAH	SUKERTAN TATA PAKRAMAN	3
	Palet 1 Indik Krama	3
	Palet 2 Indik Prajuru lan Dulun Desa	7
	Palet 3 Indik Kulkul	10
	Palet 4 Indik Paruman	11
	Palet 5 Indik Druwen Desa	13
	Palet 6 Sukertan Pamitegep	15
	Kaping 1 Karang, Tegal, Lan Carik	15
	Kaping 2 Pepayonan	16
	Kaping 3 Wewangunan	17
	Kaping 4 Wewalungan	18
	Kaping 5 Bhaya	19
	Kaping 6 Panyanggran Banjar	20
CATURTHAS SARGAH	SUKERTAN TATA AGAMA	21
	Palet 1 Indik Dewa Yajnya	21
	Palet 2 Indik Resi Yajnya	26
	Palet 3 Indik Pitra Yajnya	27
	Palet 4 Indik Manusa Yajnya	31
	Palet 5 Indik Bhuta Yajnya	32
PANCAMAS SARGAH	SUKERTAN TATA PAWONGAN	34
	Palet 1 Indik Pawwahan	34
	Palet 2 Indik Nyapihan	35
	Palet 3 Indik Sentana	35
	Palet 4 Indik Warisan	36
SAD SARGAH	WICARA LAN PAMIDANDA	36
	Palet 1 Indik Wicara	36
	Palet 2 Indik Pamidanda	37
SAPTAMAS SARGAH	NGUWAH - UWUHIN AWIG-AWIG	39
ASTAMAS SARGAH	SAMAPTA	39

MURDDHA CITTA

OM AWIGHNAM ASTU NAMA SIDDHAM

Sembah bakti miwah pengastawan titiang majeng ring paduka Bhatara-Bhatari sesuwunan titiang sami, riantukan wantah malarapan panghyangning kalih paswecan Ida Sang Hyang Widhi Wasa asung kertawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, Desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kecirenin antuk wentene pakilit Tri Hita Karana sane nenten dados pasahang, luwire :

- ha. Parhyangan, sahanan parhyangan panyitwan Desa, genah ngarcana bhawan Ida Sang Hyang Parama Wisesa, pinaka jwan Desane ;
- na. Pawongan, gebogan Krama saha warga Desa maka sami pinaka bayu pramanan Desane, mawinan Desane prasida maolah prawreti ;
- ca. Palemahan, sahananing lahan kekuwuban wewidangan Desa, pinaka stulan Desane.

Adung palemoning Bhuwana Agung ring Bhuwana Alit, maka tarapan ngupadi santa jagadhita, punika sinanggeli murddhaning prayojana pangriptaning awig-awig iki, rikala paseban mami Krama Desa Adat Susut pinaka sepat siku-siku pamatut miwah pamutus wastu kasidan prayojanan mami kabeh, prasama angidep muwah amageh aken linging awig-awig kadi ring sor iki.

PRATHAMAS SARGAH
ARAN LAN WEWIDANGAN DESA

Pawos 1

- (1) Desa Adat puniki mawasta Desa Adat Susut
- (2) Jebar kekuwub wewidangannya mawates nyatur desa :
 - ha. Sisi wetan Desa Adat Pinge
 - na. Sisi Kidul Subak Pacung
 - ca. Sisi Kulon Tukad Yeh Ening
 - ra. Sisi Lor Desa Adat Tinungan
- (3) Jebar kekuwub wewidangan sane kawengku antuk wates-wates inucap wenten : 63,13 Ha.
- (4) Sane kamanggehang ngranjing dados kekuwub wewidangan Desa Adat puniki, manut dresta, juwire :
 - ha. Pupulan karang paumahan sane sinanggeh Palemahan Desa Pakraman ;
 - na. Setra, carik miwah legal sane wenten ring kakuwub wewidangan Desa Adat puniki sajabaning Palemahan Desa Pakraman, manggeh ngranjing dados Tlanjakan Desa Adat Susut.
- (5) Desa Adat puniki wantah kawangun antuk, 1 (siki) Banjar, inggih punika Banjar Susut.
- (6) Awig-awig, Pararem miwah sahanan Pasuruan Desa, manggeh kajejerang ring jebar kekuwub wewidangan Desa Adat puniki sami.

DWITIYAS SARGAH
PATITIS LAN PAMIKUKUH

Pawos 2

Desa Adat Susut ngamanggehang pamikukuh, minakadi :

- (1) Pancasila
- (2) Undang-Undang Dasar 1945, pamekas pasal 18
- (3) Tri Hita Karana, manut sadacara Agama Hindu

Pawos 3

Luwir Patitis Desa Adat Susut inggih punika :

- (1) Mikukuhin miwah ngrajegang Sang Hyang Agama
- (2) Nginggilang tata prawretine maagama
- (3) Ngrajegang kasukertan Desa saha Pawongannya sekala lan niskala

TRTIYAS SARGAH
SUKERTAN TATA PAKRAMAN

Palet 1

Indik Krama

Pawos 4

- (1) Sahananing sang jenek mapaumahan ring wewengkon wewidangan Desa Adat Susut sinanggeh warga Desa Adat Susut.
- (2) Warga Desa inucap ring ajeng, linggihnyane wenten 2 (kalih) soroh :

ha. Warga Desa sane maagama Hindu tur sareng nyungkemin Kahyangan
Desa Adat Susut sinanggeh Krama Desa Adat Susut.

na. Sajaba punika, sinanggeh Tamiu. sane kasulurang manut pararem.

Pawes J.

Dasar Pakraman :

- (1) Sahananing Warga Desa Adat Susut sane sampun marabian, patut ngawit dados Krama Desa.
- (2) Satunggil Krama, manut karendahan kulawargannya, patut keni sinalih tunggil ayah-ayah :
 - ha. Ayahan Ngarep
 - na. Ayahan Balu
- (3) Sasengker ngawit tedun ngayah :
 - ha. Marep ring Krama Desa sane mawit saking pawiwahan, Ngawit saking puput makala-kalan.
 - na. Marep ring Krama Desa sane mawit saking ngarangin, kepatutang keni ayah-ayah ngarep, kasulurang manut pararem.
- (4) Krama Desa sane wenang nyada yan sampun kapastika, luwire :
 - ha. sungkan tahunan
 - na. yan sampun maderbe pangentos utawi penyelidii
 - ca. risampun mayusa 70 warsa sakewanten kantun manggeh keni dana punia.
- (5) Sang saking sewosan desa yan sareng tedun makrama desa ring Desa Adat Susut patut keni batu-batu utawi pamogpog, sane agengnya kasulurang manut pararem.

- (6) Yening wenten krama saking sewosan desa sareng ngranjing makrama desa ring Desa Adat Susut patut kadufurin antuk surat keterangan sane jangkep.

Pawos 6

Wusan dados Krama Desa, luwire :

- (1) Sangkaning

ha. seda ;

na. pinunas ngraga, manawi magingsir linggih saking wewengkon Desa Adat Susut.

ca. kanorayang, malantaran piwal ring awig-awig miwah Pararem Krama desa, utawi tan satinut ring pituduh Prajuru sajeroning indik nyupat sikian, minakadi nenten prasida ngesehin prawreti ;

- (2) Sang wusan dados Krama Dea tan polih pahpahan druwen Desa, sawawaning pahpahan sane mawit saking utsahan Banjar, miwah tan polih pasayuban malih sajeroning ala ayu.

Pawos 7

Sahanan Krama Desa, patut keni tetegenan utawi ayah-ayah, luwire :

- (1) Ayahan Ngarep, mapiteges paturunan miwah ayahan memungkul saking Krama Ngarep.

- (2) Ayahan Balu, luwire :

ha. Balu remban, sane pianaknyane kantun alit-alit, punika keni ayahan balu remban.

- na. Balu ngelintik, keni ayah-ayah balu manut balunnyaane, yan lanang keni ayahan lanang, yan istri keni ayahan istri.
- (3) Ritatkala ngardi wewangunan kabuatan Desa Adat, Kramane sajaba keni ayahan manut pawos 7. Taler keni paturunan sakadi ring sor
- ha. Paturunan samawibhaga manut pararem
- na. Dana Punia, manut kalascaryan sang madana punia.
- (4) Krama Desa, kadadosang :
- ha. Mapuangkid utawi tan tedun ngayah / parum :
- 1). Rikala mapawangunan, ngraabin, nangun yajnya, nandur, kaluwasan masengker dewasa ;
 - 2). Keni dadawuhan saking Guru Wisesa ;
 - 3). Kapialang, luwire : sangkan, matepetin, kalayusekaran, lan sakancan punika.
- na. Dados ngwakilang ring jadmata tiosan, sané sampun menek daa / truna.
- ca. Dados mogpog utawi numbas ayahan, prade :
- 1). Dados Pegawai Negeri utawi Pegawai Perusahaan Swasta ;
 - 2). Magenah ring desa sewosan malantaran ngreroh pakaryan.
- ra. Dados nyeledii utawi nyuksukin Krama Ngarep yan sampun mayusa 17 warsa.

Pawos 8

Kapatutan Krama Tamu :

- (1) Krama Tamu, patut madana punia ring Desa Adat/Banjar, manut pararem.
- (2) Krama Tamu, patut polih pasayuban marupa pitulung rikenjekan katiben pancabhaya.

Pawos 9

Paturunan miwah Leluputan .

- (1) Paturunan utawi peson-peson sajeroning ngulati kasukertan Desa Adat/Banjar, kapitegenang ring Krama Desa/Banjar.
- (2) Desa adat/Banjar, maweh leluputan ayah-ayah miwah peson-peson ring sang inggiling linggih miwah sang kawelasarsan.
- (3) Sor singgih leluputan miwah bacakan sang polih leluputan, kaunggangang jeroning Pararem.
- (4) Sajawaning Prajuru Desa/Banjar, sane taler polih leluputan, luwire :
 - ha. Para sadhaka, minakadi Pamangku Kahyangan/Panyiwian Desa, lan panyada manut Pararem ;
 - na. Para serati lan sutri ;
 - ca. Sang sungkan tahunan ;
 - ra. Wong cedangga banget ;
 - ka. Wong ubuh meme bapa, jantos mayusa 17 warsa.

Palet 2

Indik Prajuru Lan Dulun Desa

Pawos 10

- (1) Desa Adat Susut kaenter antuk Prajuru Desa Adat, kamanggala antuk Bendesa Adat.
- (2) Prajuru Desa Adat/Banjar, patut :
 - ha. Mawit saking Krama Ngarep utawi Pangele ;

- na. Kandegang Prajuru malantaran antuk pamilihan jeroning Paruman Krama Desa/Banjar, nyabran 5 warsa, sajawaning wenten pari indikan tios, tur sang sampun puputing panumaya, kengin kapilih malih ;
- ca. Maduluran atur piuning ring Pura Desa

Pawos 11

- (1) Bendesa Adat, karombo antuk :
 - ha. Panyade, pinaka wakil Bendesa Adat.
 - na. Panyarikan, pinaka Juru Surat
 - ca. Patengen, pinaka Pangemong Druwen Desa.
 - ra. Kasinoman, pinaka Juru Gumencang
- (2) Sajeroning ngenterang kasukertan, kaniskala, Bendesa Adat, patut misinggihang Pamangku Kahyangan Desa.
- (3) Prajuru Desa taler ngadegang Dulun Desa utai Panglingsir, sane sinanggeh Kerta Desa, mawit saking Prajuru sane sampun puputing panumaya, sang wikan ring adat miwah agama, Kepala Desa miwah sane lianan, sane kasulurang manut Pararem.

Pawos 12

- (1) Swadharmaning Bendesa Adat, luwire :
 - ha. Ngenterang paruman-paruman Desa/Banjar.
 - na. Ngenterang panglaksanaan sadaging awig-awig miwah, pamutus-pamutus Krama Desa/Banjar, sane sinanggeh Pararem.
 - ca. Ngraksa miwah nudonang tata-tiline migunayang sarajabrana druwen Desa.

- ra. Nuntun saha ngenterang Krama Desa rawuhing Warga Desa sami, ngupadi kasukertan sekala lan niskala.
 - ka. Nuntun saha nyaksi upacara sangaskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titine migunayang Selra.
 - ta. Mawosin miwah niwakang pamutus marep ring wicaran Warga Desa.
 - sa. Ngwakilin Desa/Banjar, matemuang bebawos ring sapa sira ugi.
 - wa. Lan sane sewosan sane wenten pakilitnya ring Desa/Banjar.
- (2) Tata-titine nglaksanayang swadharma inucap ring ajeng, tan maren patut satinut ring daging awig-awig, pararem, dresta miwah pamutus paruman Desa/Banjar.
 - (3) Panglaksanane ring ajeng patut kasiarang ring Desa/Banjar kapungkuripun.
 - (4) Sumakuta utawi sumanggep natak pamutus paruman Desa/Banjar, ngeninin swadharman sowang-sowang Prajuru.

Pawos 13

Patias utawi olih-olihan Prajuru/Dulun Desa, luwire :

- ha. luput reramon utawi peson-peson ;
- na. luput paturunan marep ring kabuatan Desa/Banjar;
- ca. polih kalih tanding ;
- ra. polih pah-pahan upon-upon pelaba carik/tegal druwen Desa ;
- ka. patias sewosan manut pararem.

Pawos 14

- (1) Prajuru/Dulun Desa, kapilih nyabran 5 warsa, ngawit saking padiwasane kaadegang Prajuru/Dulun Desa.
- (2) Prajuru/Dulun Desa sane swadharmannya sampun puputing sengker, kengin kapilih malih.
- (3) Pari indikane ngadegang Prajuru/Dulun Desa sakaluwire, kapastikayang malarapan Paruman Krama Desa tur kaingkupin antuk Krama.
- (4) Wusan dados Prajuru/Dulun Desa, sangkaning :
 - ha. lina;
 - na. pinunas ngraga malantaran jalaran sane pastika ;
 - ca. swadharmannya sampun puputing sengker ;
 - ra. kawusanang / kanorayang olih Krama Desa duaning iwang pamargi, menawi nilar sesana.
- (5) Ngentosin, ngwusanang ulawi nganorayang Prajuru/Dulun Desa, patut kamargiang sajeroning Paruman Krama Desa tur kaingkupin antuk Krama Desa.

Palet 3

Indik Kulkul

Pawos 15

- (1) Dudonan Kulkul ring Desa Ada Susut , luwire :
 - ha. Kulkul Desa ;
 - na. Kulkul Banjar ;
 - ca. Kulkul sekan-sekaa.

- (2) Kulkul Desa/Banjar, kamanggehang pinaka piranti utawi sarana tengeran maka wangsit, ring wewengkon wewidangan Desa/Banjar.
- (3) Tetepakan suaran kulkul manut dresta, tur anggah-ungguh tetepakanipun kaunggahang Jeroning Pararem.

Pawos 16

- (1) Kulkul Desa/Banjar, tan wenang katepak yan tan sangkaning pituduh Prajuru, sajawaning tengeran kapancabhayan.
- (2) Sang nepak Kulkul Desa/Banjar, tan sangkaning pituduh Prajuru, patut digelis atur supeksa maka buatan panepake ; yan piwal, sang mamurug wenang katibakin danda, manut pararem.
- (3) Kulkul sekaa-sekaa miwah kulkul pondokan-pondokan, tan kalugra nyawerin, utawi matehin sukat miwah tetepakan Kulkul Desa/Banjar ; prada mamurug, sang mamurug taler wenang katibakin danda, manut pararem.

Palet 4

Indik Paruman

Pawos 17

- (1) Dudonan Paruman ring Desa Adat Susut Iuwire :
 - ha. Paruman Krama Desa, kawentenang sanistannya apisan Jeroning awarsa utawi manut kabuatan, sane karihinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
 - ca. Paruman Prajuru/Dulun Desa, kawentenang manut kabuatan.

ka. Paruman sekaa-sekaa, kawentenang manut kabuatan.

(2) Pamargin Paruman Krama Desa/Banjar, patut nganutin dudonan :

ha. Paruman wahu kengin kakawitin sesampune ketedunin antuk pinih kedik kalih pah tiga lintang saking sang patut ngamifetin, kamanggala antuk tengeran suaran kulkul, mabusana adat Bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana lan cane.

na. Maka pangawit, kalaksanayang panyacak pengesep, karuntutin antuk nyacak dedosan, wahu kalanturang antuk parum ; sesampun parumane puput, patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alit ipun, kasulurang manut pararem.

ca. Maka pamastika wahu kengin nyacak pangesepe, kasulurang manut pararem.

ra. Sajeroning paruman tan keluarga ngwetuang wak ghora minakadi ngardi biota ; sang mamurug, wenang keni pamidanda bea pacamil, sakadi dandaning anguman-uman ring paseban, sane kasulurang manut pararem.

ka. Pamutus bebawos sane briuk sapanggul utawi ingkup, punika sane kaaptiang tur kamanggehang.

(3) Prade daging peparumane nenten kaingkupin, Prajuru Desa/Banjar mangda ngilikang bebawos, saha pamutusnya mangda keraremin antuk Krama Desa/Banjar ; bilih jantos ping tiga taler nenten prasida kaingkupin Prajuru Desa/Banjar dados nunas bawos ring Kerta Desa nganutin dudonan : kaingkupan paiguman Prajuru, kaingkupan paguman Kerta Desa, pinih untat, malih katunasang pamutus sajeroning Paruman Krama Desa/Banjar.

Pawos 18

- (1) Sajeroning Paruman Krama Desa, Bendesa Adat patut nyiarang pamargine ngenterang Desa, pamekas ngeninin indik :
 - ha. Munjuk lungsuring gebogan pakraman saha ayah-ayahanyane, minakadi sulur arthabrana druwen Desa.
 - na. Pangrencanan Prajuru, ngeninin utsahan Desane kapungkur.
- (3) Pamutus Paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos 19

- (1) Paruman Prajuru/Dulun Desa, kawenangang wantah ngrincikang pangrencana marep ring utsahan Desane kapungkur.
- (2) Paruman Prajuru Desa, tan kawenangang ngamedalang tetegenan ring Krama Desa, saderenge kaingkupin antuk Krama Desa.
- (3) Pamutus Paruman Prajuru/Dulun Desa, kengin ngwentuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet 5

Indik Druwen Desa

Pawos 20

- (1) Sane kamanggehang dados druwen Desa Adat Susut luwire :
 - ha. Kahyangan Desa, luwire :

- 1). Kahyangan Tiga : Pura Desa, Pura Puseh, Pura Dalem.
- 2). Kahyangan druwen Desa sewosan ring Kahyangan Tiga, minakadi :
Mrajapati, Palinggih Bale Banjar, Jogaragung Dalem Sari.
 - na. Bale Banjar
 - ca. Tanah tegalan 1,06 Ha
 - ra. Setra 0,06 Ha
 - ka. Palaba Pura, marupa carik 222 Ha,
 - da. Niasa lan Sesanti ;
 - ta. Lelangwan, minakadi tetabuhan lan ilen-ilen druwen Desa, luwire :
 - 1). Gong Banjar sane sinanggeh druwen Banjar / Desa Adat;
 - 2). Ilen-ilen wali ring pura : rejang, pendet
 - 3). Lekita-lekita : pipil utawi sertipikat, awig-awig, pasuara, pararem
Desa Adat Susut.
 - 4). Palawatan Ida Bhatara marupa : Pratima
- (2) Olih-olihan Desa Adat Susut mawit saking :
 - ha. Upon-upon palaba pura ;
 - na. Paturunan saking Krama Desa ;
 - ca. Paica saking Guru Wisesa ;
 - ra. Dana punia tiyosan sane patut ;
- (3) Sanangken Paruman Krama Desa, Bendesa Adat patut nyiarang munjuk
lungsur upon-upon laba pura lan sapanunggalannya sane sinanggeh druwen
Desa.
- (4) Upon-upon palaba pura lan sapanunggalannya, kanggen prabea piodalan
miwah wewangunan ring pura, taler prabea tiyosan marep ring kabuatan Desa
Adat.
- (5) Sakaluwiring druwen Desa patut wenten lekitannya sane pastika.
- (6) Tan kalugra ngadol utawi ngesahang druwen Desa yan tan kacumponin antuk
Krama Desa sami.

Palet 6

Sukerta Pamitegep

Kaping 1

Karang, Tegai, Lan Carik

Pawos 21

- (1) Krama Desa sane ngamong karang Desa utawi karang pumahan ngraga, patut ngwatesin karangnya sowang-sowang antuk pagehan/turus utawi tembok, mangda pakantenannya asri.
- (2) Watese sane mawasta gegaleng kaluan miwah gegaleng kateben mangda nganutin dresta, tur kakaryanin olih sang negen wates inucap.
- (3) Prade karasayang pagehan/turus inucap nglikadin, yan pada arsa panyandinge, watese kengin nganggen pinget utawi prachina pal saking Agraria, sakewanten kasaksi antuk Prajuru Desa/Banjar.
- (4) Prade wenten karang kabebeng, mangda kautsahayang wenten pamesuannya sane pastika.

Pawos 22

- (1) Sinalih tunggil Krama Desa/Krama Banjar, nenten kalugra :
 - ha. ngalah-alah margi, karang desa, tegai ayahan desa, tegai/carik krama lian, lan sakancan punika ;
 - na. ngalah-alah tegak kahyangan, setra, lan sakancan tegak sane sinanggeh suci.

- (2) Prade wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci, tioasan ring ngwaliang tanah tegak suci inucap, taler patut karuntulin antuk dewa danda mlwah artha danda, dewa danda minakadi guru piduka, artha danda 50 Kg beras.

Kaping 2

Pepayonan

Pawos 23

- (1) Ngawit nandur pepayoman minakadi tanem tuwuh, patut 3 (ligang) depa agung ngajeroang saking wates ; pepayoman minakadi tanem tuwuh sane jantos ngliwat wates, wenang kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang pepayonan inucap patut kawara tur kairing mapiguman, antuk sang rumasa katetehan, bilih-bilih sang nruwenang, arsa ngrebah utawi notor wit pepayonane punika.
- (3) Pradene sampun kawara taler tan wenten utsahan sang nruwenang, sang rumasa ketetehan wenang masadok ring Prajuru, tur risampune kaparitalas kandugi wenten lelugrahan Prajuru, wahu wit pepayonane punika kengin karebah, wit pepayonane sane kerebah punika, kadruwenang sareng kalih.
- (4) Sang keni pamidanda penyangaskara saha prabya marep ring wewangunan sang karubuhan lulre
ha. Sang nruwenang wit pepayonan sane sinanggeh mayanin, pradene pungkut tur ngrubuhin wewangunan krana fios.

na. Sang notor, monggol, utawi ngerebah taru tur ngrubuhin wewangunan
krana tios, makehnya : agung, wewangunan rawuh sepuputipun.

- (5) Krama Desa patut ngamanggehang kawredian tanem tuwuh sane ngawinang
Desane asri tur lestari sane kawastanin Bhuta Hita, sane mateges
kalestarian lingkungan hidup.
- (6) Sinalih tunggil krama sane pacang ngrebah pepayonan minakadi tanem
tuwuh sane ngawinang Desane asri tur lestari, patut masadok ring Prajuru.

Kaping 3

Wewangunan

Pawos 24

- (1) Nyabran ngwangun, sowang-sowang krama desa patut :
ha. Masadok ring Prajuru, pamekas marep ring wewangunan sane
mapanyaitan minakadi menengin wates ;
na. Ngangge Asta Bhumi miwah gegulak Asta Kosali, sanistanya manut ring
patitise ka niskala.
- (2) Prade wewangunane jantos nyayubin ka pisaga, bilih-bilih temboke ring
telenging wates, risampune kawara tur kairing mapiguman taler tan wenten
utsahan sang nruwenang, kangkat kasadokang ring Prajuru ; sesampune
kaparitatas tur wenten lelugrahan Prajuru, sang nruwenang wenang kadanda
manut pararem tur lembok inucap patuf kagubar olih sang nruwenang,
sanistannya mangda kakaryanang abangan.

Kaping 4

Wewalungan

Pawos 25

- (1) Sahanan warga desa sane miara wewalungan : bawi, banteng, lsp mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Prade wenten wewalungan malumbar utawi ngeleb tur ngrusak karang utawi pabianan krama sewosan, risampune kawara taler nenten wenten utsahan sang nruwenang, yan wewalungan punika malih ngrusak karang utawi pabianan krama sewosan wewalungan inucap kengin kataban, tur sang nruwenang wenang katibakin danda ngwaliang panukun wit tetandurane sane karusak, saha nahur panebas pepiaran tetabanan, manut panglokikan Prajuru Desa.
- (3) Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampune kaparilatas antuk Prajuru, sang nruwenang wewalungan inucap wenang keni dewa danda lan artha danda, agung alit ipun manut kecap sastra agama, sane kapikukuh antuk Krama Desa.
- (4) Krama Desa patut nyerayanin wewalungan miwah sarwa prani, lan kapatut mademang paksi, nuba utam lan sakancan punika, pinaka sinalih tunggil utsahan Krama Desa ngardi Bhuta Hita.
- (5) Sang mamurug kecape ring ajeng, wenang keni danda manut pararem.

Kaping 5

B h a y a

Pawos 26

- (1) Bacakan bhaya luwire jiwabhaya, arthabhaya, agnibhaya, toyabhaya, lindubhya, lsp, sane ketahipun kawastanin pancabhaya.
- (2) Sinalih tunggil krama sane manggihin pracinna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Prade Desane kahanan jiwabhaya, Krama Desane patut ngaturang upacara pamahayun Desa manut kecap sastra agama sane kapikukuh antuk krama, tur sang ngwetuang jiwabhaya, katur ring sang ngawawenang.

Pawos 27

- (1) Sinalih tunggil krama sane manggihin pracinna pastika wentene arthabhaya (kamalingan), patut digelis nepak kulkul tengeran pamitulung manut pawos 15 (4) utawi pawos 16 (1) ; sang kamalingan patut atur supeksa ring Prajuru ; sang kacihnan ngamaling, katur ring sang ngawawenang, maweweh malih patut keni dewa danda lan ngwaliang barang sane kapandung (kamaling).
- (2) Sowang-sowang Krama Desa tan kapatut mapailonan ring dusta , sang kacihnan mapailonan ring dusta patut katibakin danda kadi dandaning maling.
- (3) Indik ngrereh reramon minakadi daun kelapa, ron, miwah sane sewosan ring pablanan krama tiosan ri kenjekati suwung, keni arta danda manut pangargan barang sane kapandung tur ngwaliang barang sane kapandung, yan ipun kacihnan ngamaling.

- (4) Yening wenten jadma ngranjingin pakubon wiadin pakarangan krama sewosan rikala suwung tur tan pawangsit, mawastu sang madruwe karang kaicalan, wenang jadma inucap kacorok mamaling saha patut madewa saksi ring pura desa utawi Bale Agung.
- (5) Mangda tan kasinanggeh manut kecape ring ajeng asing-asing ngranjingin pakubon jadma sios patut :
- ha. matengeran suara ;
 - na. nyantos sang nruwenang karang rawuh utawi masadok ring panyanding pinih tampek, makabuatan pangranjinge.
 - ca. pemedal sang maderbe karang kedagingin sawen maka cihna wenten pangarah rikala suwung.

Kaping 6

Panyanggran Banjar

Pawos 28

- (1) Krama Banjar ring sawewengkon Desa Adat Susut patut sareng nyanggra karya suka dukan sowang-sowang Krama Banjar.
- (2) Tetibak panyangrane inucap ring ajeng, kasulurang manut pararem.
- (3) Sowang-sowang Krama Banjar sane pacang nangun karya suka-duka sane mabuat, mangda masadok ring Prajuru

CATURTHAS SARGAH

SUKERTAN TATA AGAMA

Palet 1

Indik Dewa Yajnya

Pawos 29

- (1) Kahyangan-kahyangan panyiwian Krama Desa Adat Susut Iuwire :
- ha. Kahyangan Tiga ; Pura Desa/Baleagung, Pura Puseh, Pura Dalem.
 - na. Kahyangan-kahyangan panyiwian Krama Desa tiosan ring Kahyangan Tiga; Mrajapati, Jogaragung, Dalem Sari, Palinggih Balai Banjar.
- (2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki.
- ha. Pura Desa / Baleagung ring rahina Buda Kaliwon Pahang
 - na. Pura Puseh ring rahina Buda Umanis Julungwangi
 - ca. Pura Dalem ring rahina Buda Wage Merakih
 - ra. Pura Mrajapati ring rahina Buda Cemeng Ireng, Jogaragung ring rahina Purnama Desta, Pura Dalem Sari, ring rahina Buda Wage Merakih.
 - ka. Palinggih Balai Banjar ring rahina Tumpek Wariga.
- (3) Pamargin pangacine ring sowang-sowang kahyangan inucap ring ajeng, manut kecap sastra agama, saha kalaksanayang kanista, madhyama, utama, manut kawentenani krama sane kaingkipun jeroning pararem.

Pawos 30

- (1) Ring sowang-sowang pura inucap ring ajeng, patut kaadegang Pamangku.
- (2) Pidabdabe ngadegang Pamangku, nganutin dudonan :
 - ha. ngawilang saking turunan utawi ngwaris ;
 - na. malantaran nyanjan utawi nuhur ring pura sane karerehang Pamangku ;
 - ca. malantaran kapilih antuk Krama Desa.
- (3) Sang tan wenang kaadegang dados Pamangku, luwire :
 - ha. cedangga, luwire : peceng, perot, cungh lan sapanunggilannya ;
 - na. nandang sakit ila, ayan, buduh miwah pinungkan sane tan keneng tinamban ;
 - ca. sang maderbe parilaksana nenten becik.
- (4) Prabea Kapamangkuan :
 - ha. prabean upakara/upacara adiksa widhi utawi ngwintenang Pamangku, ka¹medalin miwah kalaksanayang antuk Krama Desa ;
 - na. marep ring prabean pitra yajnya ring Pamangku, Panyade, Serati, Sutri, yan seda ri wekas, Krama Desane patut maweh dana punia atiwa-atiwa, manut pararem.
- (5) Pamangku, patut ngamanggehang sesana miwah agem-ageman Pamangku.

Pawos 31

Swadharmaning Pamangku, luwire :

- ha. ngenterang upacara piodalan ring kahyangan sane kaempon utawi ring pakubon sowang-sowang krama ;

- na. Prade sinalih tunggil Pamangku Kahyangan Desa kapialang utawi cuntaka,
kengin nyelang Pamangku Kahyangan Desa tiosan, utawi nuhur sang
sulinggih, katitenin antuk Prajuru ;
- ca. Yan Pamangku kalayusekaran, wenang anglepas swadharma, kasulurang
manut pararem ;
- ra. Yan Pamangku sampun tigang rahina ngayah ring pura sane kaempon, kancit
wenten kulawargannya kalayusekaran, Pamangku inucap tan keneng
cuntaka, sakewanten nenten kengin budal salamin piodalan ;
- ka. Munggah tedun ring palinggih-palinggih Kahyangan Desa miwah ngiyasin
pralingga-pralingga, manut pamastikan Prajuru ;
- da. ngrajegang sesanan Pamanku.

Pawos 32

Patias utawi olih-olihan Pamangku, luwire :

- ha. panyolasan miwah sarin canang rikala muput yajnya ring sowang-sowang
pakubon krama ;
- na. upon-upon palaba carik miwah legal, manut pararem ;
- ca. luput pakaryan miwah reramon ;
- ra. polih sarin canang rikala wenten aci ring kahyangan sane kaemponin manut
pararem ;

Pawos 33

(1) Pamangku kagentosin, riantukan :

ha. seda ;

na. pinunas ngraga, menawi kageringan lan sapanunggifannya ;

- ca. kawusanang antuk Krama, riantukan nilar sesanan Pamangku
- (2) Tata carane ngadegang miwah ngentosin Pamangku, kasulurang manut pararem.

Pawos 34

Indik Kasukertan Kahyangan, kadudonang sakadi ring sor puniki :

- (1) Sane nenten kalugra ngranjing ka pura, luvire :
- ha. Sang katiban cuntaka, minakadi sebel ngraga :
- 1). sebel kandel ngrajaswala, salami dereng mabresih ;
 - 2). sebel anuk ngembasang putra, salami 42 rahina, pateh ring sang karuron ;
 - 3). sebel pangantenan ; sadereng mabiakala utawi makaia-kalan ;
 - 4). sebel riantukan kalayusekaran, jantos puputing sengker sane kaingkupin jeroning pararem.
- na. Makta sahananing bebaktan sane sinanggeh ngletehin, manut kecap sastra agama.
- ca. Sato agung minakadi wewalungan suku pat, sajawaning rikala mapepada
- ra. Anak alit sadereng mayusa tigang sasih.
- ka. Mabusana sane lan manut kadi tatacaraning ngranjing ka pura.
- da. Sadereng polih wak-wakan utawi pituduh saking Prajuru Desa.
- ta. Sang panten miwah anak bebinjat sadereng maupakara.
- (2) Tata Busana ngranjing kapura wenang nganutin dresta minakadi :
- ha. Ritatkala ngaturang ayah mawastra lan nyelempot.
- na. Ritatkala ngaturang sembah mabusana jangkep.

- ca. Siosan kadi ring ajeng nenten kalugra sajabaning sampun polih pituduh prajuru.
- (3) Pratingkahe tan wenang ring pura, luwire :
- ha. masumpah utawi macoran, sajawaning pituduh Prajuru Desa ;
- na. ngemedalang wak parusya utawi wak capala ;
- ca. mabanyu, makoratan, masesenengan, makolem dados asiki lanang wadon, nyangsang busana ;
- ra. Ngias raga minakadi menahang wastra, menahang pasungan lan sakancan punika, sajawaning sang sulinggih miwah pinandita.
- (4) Sewosan ring Pamangku tan kalugra mungguh tedun ring palinggih-palinggih, sajawaning wit saking pituduh Prajuru Desa.
- (5) Sang mamurug kecape ring ajeng, wenang keni dewa danda, keni pamrayascitta sapatutnyane.

Pawos 35

- (1) Yan wenten jadma karawuhan ring pura boya saking nyanjan tur ngawinang kramane biapara, wenang keni pamrayascitta sapatutnyane.
- (2) Prade Kahyangan Desane kahanan durmanggala minakadi kapancabhayan Pamangku patut digelis masadok ring Prajuru Desa.
- (3) Indik upakara/upacara pamahayun kadurmanggalan Kahyangan Desa, mapagamel kecap sastra agama, sane kasungkemin olih Krama Desa.

Palet 2

Indik Resi Yajnya

Pawos 36

- (1) Sang pacang madeg sulinggih utawi madwijati patut masadok ring Prajuru Desa miwah Parisada Hindu Dharma Indonesia.
- (2) Prajuru Desa patut ngawas lan nitenin tur wenang mialangin, prade kacihnan wenten indik sane tan manut kecap sastra agama, tur sareng nyaksi upakara / upacara padwijatiannya, saha nglantur nyiarang jeroning Paruman Krama Desa tegap rawuhing wates kawenangannya muput yajnya.

Pawos 37

- (1). Sajeroning muput yajnya, Sang Sulinggih patut ngutamayang muput yajnya ring wewengkon Desa Adat Susut, sesampune puput, wahu muput yajnya ring wewengkon desa tiosan utawi ka dura desa.
- (2) Krama Desane sami, patut sareng ngawas lan nitenin katuntun antuk Prajuru, mangda sahanan yajnya sane kalaksanayang olih sowang-sowang Krama Desa kapuput tur kasulurang antuk sang mayajnya sakadi patut ipun.

Palet 3

Indik Pitra Yajnya

Pawos 38

- (1) Desa Adat Susul patut sareng nyanggra yan wenten sinalih tunggil krama sane nglaksanayang Pitra Yajnya.
- (2) Tatacara panyanggrane inucap ring ajeng kasulurang manut pararem.
- (3) Dudonan pamargin Pitra Yajnya :
 - ha. majalaran mendem utawi ngeseng, cihna makingsan ring Prathiwi utawi makingsan ring Geni, pinaka dharana antos nuptupang prabea ;
 - na. majalaran upacara pangabenan utawi palebon ;
 - ca. riwusan ngaben, patut kalanturang malih antuk upacara memukur tur karuntutin malih antuk nglinggihang dewa pitara.

Pawos 39

- (1) Sinalih tunggil krama sane kalayu sekaran / atiwa-atiwa, mangda masadok ring Prajuru.
- (2) Swadharmaning Desa/Banjar :
 - ha. Kelihan Banjar/Kelihan Adat patut maritatas sang kaduhkitan, napike pacang kapendem, makingsan ring Geni, utawi lantur kaabenang.
 - na. Prade kapendem, raris kawentenang panepak kulkul tengeran kalayu sekaran.
 - ca. Panyanggran Krama Banjar salanturnya manut sakadi sane sampun kaunggahang jeroning pararem, jantos pependemane puput.

- ra. Prade makingsan ring geni, panyanggran Krama Banjar salanturnya, manut kadi daging pararem, jantos pamargin upacarane puput.
- ka. Prade kaabenang, panyanggran Krama Banjar salanturnya, manut kadi daging pararem, jantos pamargin upacarane puput.
- (3) Tak kalugra nginepang bangbang.
- (4) Desane maweh galah ring sang kalayusekaran sajeroning pitung rahina kengin atiwa-atiwa, sajawaning wenten kabuatan tios saking sang yajamana.
- (5) Larangan pependeman miwah palebon ring wewengkon Desa Adat Susut kaunggahang jeroning pararem.
- (6) Prade wenten kalayusekaran rikala piodalan ring Kahyangan Desa, kengin mendem tan pasadok, tur patut ngrereh galah mamargi rikala wengi.

Pawos 40

- (1) Desa Adat Susut ngamanggehang indik cuntaka, mapagamel ring Pamutus Mahasabha Parisada Hindu Dharma Indonesia.
- (2) Tatacarane nyulurang kacuntakan, mapagamel kecap sastra agama, kaanutang ring drestan desa, sane kaingkupin jeroning pararem.
- (3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen Desa miwah druwen sowang-sowang krama.
- (4) Sang mamurug, patut keni dewa danda, prayascita sepatutnya.
- (5) Sengker utas cuntaka manut kawentenannya, kasulurang sakadi ring sor puniki :
- ha. Kalayusekaran, cuntakannya kaanutang ring drestan desa miwah sastra dresta.
- na. Ngrajaswala, cuntakannya tigang rahina ngawit saking ngrajaswala, utawi salaming ngrajaswala.

- ca. Ngembasang putra, abulan pitung rahina ngawit saking putrane embas, nganton katiwakin upakara/upacara tutug kambuhan.
- ra. Karuron, cunlakannya abulan pitung rahina ngawit saking karuron, ngantos katiwakin tirta pamrayascita.
- ka. Pawiwahan, cunlakannya ngantos sampun makala-kalan.
- da. Gamia gamana, cunlakannya ngantos sampun kapalasang, karuntutin antuk mrayascita sikian, Desa Adat miwah Kahyangan Desa.
- ta. Salah timpal, cunlakannya kapuputang manut kecap sastra agama miwah drestan desa.
- sa. Anak istri mobot malantaran lokika sanggraha kandugi nenten katiwakin upakara/upacara pabiakawonan, cunlakannya ngantos katiwakin upakara/upacara pabiakawonan.
- wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pabiakawonan miwah widhi widhana, cunlakannya ngantos wenten meras anake alit, karuntutin antuk upakara/upacara manut kecap sastra agama.
- la. Sad atatayi, cunlakannya ngantos sampun mrayascita sikian miwah ngesehan prawreti.
- ma. Mamitra ngalang, cunlakannya ngantos katiwakin upakara/upacara pabiakawonan.
- (6) Cuntaka kalayusekaran/kapademan :
- ha. Kapendem, cunlakannya :
- 1). Cuntaka ka Banjar, laminipun ligang rahina ngawit saking wusan mendem, ngantos sampun maprayascita (masepuh).
 - 2). Kulawargannya sajeroning pakarangan manut dresta.
- na. Kaabenang, cunlakannya :
- 1). Cuntaka ka Banjar, manut dresta sane kapikukuh antuk pararem.

- 2). Cuntakan sang nyambut karya pitra yajnya, manut dresta sane kapikukuh antuk pararem.
- (7) Sang katiben cuntaka, luwire :
- ha. Kalayusekaran, sane cuntaka :
- 1). sang kalayusekaran
 - 2). kulawargannya.
 - 3). bebanjarannya.
- na. Ngrajaswala, sane cuntaka : sang ngrajaswala
- ca. Ngembasang putra, sane cuntaka : sang maderbe putra, lanang wiadin istri, utawi yayah renan sang wahu embas.
- ra. Pawiwahan, sane cuntaka : sang mawiwaha, lanang wiadin istri.
- ka. Karuron, sane cuntaka : sang karuron rawuhing lanangnyane.
- da. Gamia gamana, sane cuntaka :
- 1). Sang nglaksanayang gamia gimana ;
 - 2). Desa adatnyane ;
- ta. Salah timpal, sane cuntaka :
- 1). sang nglaksanayang salah timpal ;
 - 2). Desa adatnyane ;
- sa. Anak istri mobot malantaran lokika sanggraha kandugi nenten katiwakin upakara/upacara pablakawonan, sane cuntaka ; anake istri sane mobot punika.
- wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pablakawonan miwah widhi widhana sane cuntaka.
- 1). sang ngembasang putra ;
 - 2). putrane sane kaembasang ;

- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang nglaksanayang sad atatayi punika.
- (8) Sang tan keneng cuntaka, luwire :
- ha. Sang Sulinggih :
- na. Pamangku Kahyangan Tiga rikala piodalan ring pura, risampune ngalang sasih utawi ngalang tengah, kacirenin antuk atur piuning miwah namceb penjor.

Pawos 41

- (1) Pamargin atiwa-liwa utawi pangabenan kalaksanayang mapagamel kecap sastra agama miwah dresta.
- (2) Papatusan pangabenan, kasulurang manut pararem.
- (3) Panginguhne ring Krama Banjar, kasulurang manut pararem.

Palet 4

Indik Manusa Yajnya

Pawos 42

- (1) Krama Desa minakadi Krama Banjar, patut sareng nyangra miwah nitenin yan wenten sinallih tunggil krama nglaksanayang Manusa Yajnya sane mabuat.
- (2) Tatacara panyanggrane inucap ring ajeng kasulurang manut pararem.
- (3) Sang pacang nglaksanayang Manusa Yajnya sane mabuat, mangda masadok ring Prajuru.

- (4) Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ring wekas.
- (5) Upacara-upacara inucap ring ajeng kamargian kanista, madhyama, utama, manut kecap sastra agama miwah dresta.

Palet 5

Indik Bhuta Yajnya

Pawos 43

- (1) Desa Adat Susut patut nyanggra pamargin Bhuta Yajnya, marep ring kabuatan Desa Adat Susut.
- (2) Pidabdab pamargin Bhuta Yajnya inucap ring ajeng, mapagamel ring kecap sastra agama, kaanutang ring drestan Desa, sane kapikukuh antuk pararem.
- (3) Krama Desa minakadi Krama Banjar patut sareng nyanggra sinalih tunggil krama sane nglaksanayang Bhuta Yajnya sane mabuat.
- (4) Sang pacang nglaksanayang Bhuta Yajnya sane mabuat, mangda masadok ring Prajuru.

Pawos 44

- (1) Bhuta Yajnya marep ring kabuatan Desa Adat minakadi carun sasih miwah sane lianan, kasulurang manut pararem.
- (2) Indik pamargin palelastian utawi makiyis, kalaksanayang awarsa apisan ring segara utawi ke ulun danu.

- (3) Nangken warsa, rikalaning Tilom Sasih Kasanga, patut kalaksanayang Tawur Kasanga, kalanturang antuk Pangrupukan, pinaka cihna nyangra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.
- (4) Rikalaning Nyepi, sowang-sowang Krama Desa patut ngamargiang Catur Brata Panyepian, inggih punika :
- ha. Amati geni : tan kengin maapi-api ;
- na. Amati karya : tan kengin nyambut karya ;
- ca. Amati lelangwan : tan kengin maoneng-onengan, ngwijilang suara ghora, nabuh gegambelan, lan sakancannya.
- na. Amati lelungan : tan kengin matelungayan mrika-mriki.
- (5) Catur Brata Panyepian punika kamargiang saking semeng jantos benjangne ngedas rahina.
- (6) Mangda¹ pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, kasulurung manut pararem.
- (7) Benjangne ring pananggal ping kalih Sasih Kadasa, kawastanin Ngembak Geni sowang-sowang krama patut saling ngaksamayang sane kawastanin Dharma Santi

PANCAMAS SARGAH
SUKERTAN TATA PAWONGAN

Palet 1

Indik Pawiwahan

Pawos 45

- (1) Krama Desa minakadi Krama Banjar, patut sareng nyanggra miwah nitenin sinalih tunggil krama sane nglaksanayang pawiwahan.
- (2) Pamargin Pawiwahan luwire :
 - ha. malantaran pepadikan ;
 - na. malantaran ngrorod utawi marangkat (ngrangkat) ;
 - ca. malantaran nyentana utawi nyentana nyeburin.
- (3) Indik Pawiwahan, Desa Adat Susut ngamanggehang Undang-Undang Nomor 1 Tahun 1974, miwah Peraturan Pemerintah Nomor 9 Tahun 1975, indik Pawiwahan.
- (4) Tatacara panglaksanannya mapagamel ring kecap sastra agama, kanutang ring drestan Desa.
- (5) Sinalih tunggil krama sane pacang nglaksanayang pawiwahan, mangda masadok ring Prajuru.

Palet 2

Indik Nyapihan

Pawos 46

- (1) Prajuru Desa minakadi Prajuru Banjar, wenang sareng mawosin miwah nitenin yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
- (2) Yan krama inucap kukuh ring pakarsannya, Desa Adat minakadi Banjar Adat, nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos 47

- (1) Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang sentana.
- (2) Indik sentana, Desa Adat Susut, ngamanggehang uger-uger jagat minakadi kawicaksanaan sang maraga Guru Wisesa, kaanufang ring drestan desa, sane kapikukuh antuk pararem.
- (3) Sang pacang ngrajeng sentana, mangda masadok ring Prajuru.

Palet 4

Indik Warisan

Pawos 48

- (1) Prajuru Desa minakadi Prajuru Banjar wenang sareng mawosin miwah nitenin yan wenten sinalih krama sane ngindikang warisan.
- (2) Indik warisan Desa Adat Susut ngamanggehang uger-uger jagat minakai kawicaksanaan sang maraga Guru Wisesa, kaanutang ring drestan Desa.
- (3) Sang pacang ngindikang warisan, mangda masadok ring Prajuru.

SAD SARGAH

WICARA LAN PAMIDANDA

Palet 1

Indik Wicara

Pawos 49

- (1) Sane wenang mawosin wicara ring wewengkon Desa Adat Susut inggih punika Prajuru Desa maka miwah Dulun Desa sane kawastanin Kerta Desa.
- (2) Prade sang mawicara tan cumpu ring Pamutus Kerta Desa, kengin nunasang ring Sang Rumawos.
- (3) Sahanan wicara sane mawil saking kacorahan sakaluwire sane sinanggeh nungkasin daging awig-awig, pasuara miwah pararem Desa/Banjar, patut digelis kabawosin olih Prajuru, nenten nyantos pasadok malih.
- (4) Sajaba wicara makadi ring ajeng, patut nyantosin pasadok sang panas bawos.

- (5) Panepase mangda pastika nyantenang iwang patut malarapan Tripramana, inggih punika : saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 50

- (1) Desa/Banjare, wenang nibakang pamidanda ring warga Desa/Banjar sane sisip.
- (2) Tetibak pamidanda inucap ring ajeng, kalaksanayang olih Prajuru.
- (3) Bacakan pamidanda, luwire :
- ha. ayahan panukun kasisipan ;
 - na. artha danda saha panikelnya, miwah panikel paturunan ;
 - ca. rerampagan ;
 - ra. kanorayang ;
 - ka. kawusanang makrama banjar ;
 - da. panyangaskara ;
- (4) Pamidanda sane katiwakang, patut masor singgih, manut kasisipan.
- (5) Jinah utawi arthabrana pamidanda, ngranjing dados druwen Desa/Banjar

Pawos 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampangan, nganutin tatacara sakadi ring sor puniki ;

- ha. Kalaksanayang olih prajuru, kasarengin antuk krama pinih akeh tigang diri, maka saksi.
- na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
- ca. Prajuru patut miteketang mangda barang-barang sane karampag punika digelis katebus masengker awuku, tur ring kutus rahinane pacang kalelang utawi kaadol.
- ra. Tan kengin ngrampag saluwiring barang sane patut inggilang manut kecap sastra agama, miwah mademang pangupajiwani sang karampag.

Pawos 52

- (1) Prade sang pacang karampag mialangin pamargin rerampagan inucap, mawastu sampun tan nganutin linging awig-awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sajawaning krama inucap kawusanang makrama Desa/Banjar, tur pipil karang ayahannya kawaliang ring Desa Adat.
- (3) Rerampagan inucap ring ajeng kabawos buntas, risampun sang keni rerampagan puniki :
 - ha. Nunas geng rena sinampura ring ajeng Krama Desa/Banjar.
 - na. Nahur pangargan panguwak pasubaya sadaweg pacang karampag, kadulurin antuk prayascita.

SAPTAMAS SARGAH
NGUWAH-UWAHIN AWIG-AWIG

Pawos 53

- (1) Nguwah-uwah Awig-Awig Desa puniki, wantah kengin kalaksanayang antuk Paruman Krama Desa.
- (2) Pakarsane nguwah-uwahin punika, mangda mawit saking pakarsan Krama Desa, yadiastun kamedalang antuk sinalih tunggil Prajuru, utawi sinarengan.

Pawos 54

- (1) Sakaluwiring indik sane sampun kamargiang sadereng awig-awig puniki kasurat, mangda kaanutang ring sadaging awig-awig puniki.
- (2) Sakaluwiring sane durung kasurat sajeroning awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

S A M A P T A

Pawos 55

- (1) Awig-awig puniki kawastanin Awig-Awig Desa Adat Susut.
- (2) Awig-awig puniki kamargiang ngawit kaingkupin utawi kararemin.

Pawos 56


- (1) Awig-awig puniki kararemin duk rahina Anggara, paing, wuku Tulu, pananggal ping 15 sasih Kalima Isaka warsa 1921 tanggal 23 Nopember 1999, magenah ring Pura Desa Susut.
- (2) Awig-awig puniki kalungguatangananin antuk Bendesa Adat Susut miwah olih sang ngawawenang manut kawenangannya sowang sowang, tur kapikukuh antuk Murdhaning Pamikukuh :Bupati Kepala Daerah Tingkat II Tabanan.
- (3) Register Nomor :

Luwir sang nglungguatangananin ;

1) Bendesa Adat Susut



2) Kelihan Adat Susut


I WAYAN WIDIA

Saksi - saksi :

3) Kepala Dusun Susut



I MADE SUANA

4) Kepala Desa Tua



I WAYAN SUWITANAYA

5) Ketua RW I Kecamatan Marga



I MADE NARIANA

6) Camat Marga



Kawikanin Olih :

1). Ketua BPPLA Kabupaten
Daerah Tingkat II Tabanan



WAYAN DJAPA

2). Ketua PHDI Kabupaten
Daerah Tingkat II Tabanan





MADE SAMBA

3). Kepala Kantor Departemen Agama
Kabupaten Tabanan,



WAYAN SENATRA

MURDHANING PAMIKUKUH,
PLT BUPATI KEPALA DAERAH TINGKAT II TABANAN,



KOMANG WIJANA

LEPIHAN II

TETINASAN NYASA MIWAH SASANTIN DESA ADAT SUSUT

1. Sibeh bucu lima, mateges : Desa Adat Susut, mapikukuh antuk Pancasila, Dasar miwah Darsana Jagat Republik Indonesia.
2. Padma lan Swastika mateges sinar suci Ida Sang Hyang Widhi Wasa - Wetune Kahuripan Sekala Niskala saha maweh kerahajengan jagat.